



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 043359 22 Iž**  
**Sarajevo, 08.08.2022.godine**

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, Dinke Bešlagić-Čovrk i Mirka Božovića kao članova vijeća, odlučujući o žalbi Jovičić Marka, R., ..., izjavljenoj protiv odluke Centralne izborne komisije Bosne i Hercegovine broj: 06-01-07-3-927/21 od 02.06.2022.godine, zbog nepodnošenja prijave o imovinskom stanju, u nejavnoj sjednici, održanoj dana 08.08.2022.godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je Marko Jovičić odgovoran što u 2020. godini nije Centralnoj izbornoj komisiji Bosne i Hercegovine podnio izjavu o imovinskom stanju u roku od 30 dana od dana prestanka mandata odnosno početka mandata, čime je prekršio odredbu člana 15.8 stav (2) Izbornog zakona Bosne i Hercegovine, pa mu je na osnovu člana 6.7 stav (1) tačka 1 i primjenom člana 19.10. stav (1) tačka b) Izbornog zakona BiH izrečena novčana kazna u iznosu od 500,00 KM.

Protiv ove odluke Marko Jovičić je blagovremeno uložilo žalbu u kojoj navodi da je podnio izjavu o imovinskom stanju, ali da nema potvrde pošte da je ona i uručena. Zato uz žalbu ponovo dostavlja izjavu navodeći da nije promjenio ni svoj status ni uvećao vrijednost imovine po tom osnovu, da isključivo živi od svoje plate, zbog čega predlaže da mu se žalba uvaži.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbeni odluka donesena na pravilan i potpun način u skladu sa zakonom i podzakonskim aktima.

Žalba nije osnovana.

Imajući u vidu relevantne propise i to odredbe člana 15.8 stav (1) i (2) Izbornog zakona BiH („Službeni glasnik BiH“ broj 23/01 do 31/16), Sud je utvrdio da je odluka CIK-e BiH pravilna i zakonita.

Odredbom člana 15.8 stav (1) Izbornog zakona BiH propisano je da su kandidati izabrani na svim nivoima vlasti dužni da u roku od 30 dana od dana objave ovjere mandata u Službenom glasniku BiH, predaju Centralnoj izbornoj komisiji BiH potpisanu izjavu o imovinskom stanju iz člana 15.7 navedenog zakona i da u skladu sa navedenom odredbom u stavu (2) Centralnoj izbornoj komisiji BiH podnese izvještaj o imovinskom stanju u roku od 30 dana nakon isteka mandata na koji je izabran, kao i u slučaju prestanka mandata u smislu člana 1.10 stav (1) tačke 1),4),5),7) i 8) navedenog zakona u roku od 30 dana od dana prestanka mandata.

Uvidom u spise predmeta ovo vijeće je zaključilo da je donosilac ožalbene odluke pravilno utvrdio da je žalilac odgovoran za nepravilnosti učinjene iz citirane zakonske odredbe, tim prije što žalilac nije dostavio izjavu o svom imovinskom stanju u zakonskom roku, tj. do 15.12.2020. godine, a ni po upućenom pozivu od strane CIK BiH od 15.12.2021. godine u ostavljenom roku od 15 dana nije dostavio izjašnjenje vezano za razloge nedostavljanja izjave o imovinskom stanju, nego je svoju izjavu o imovinskom stanju dostavio tek u prilogu svoje žalbe.

Opisanim postupanjem žalilac je počinio prekršaj odredbe člana 15.8 stav (2) Izbornog zakona BiH, pa mu je pravilnom primjenom materijalnog prava odredbe člana 6.7 stav (1) tačke 1) i odredbe člana 19.10 stav (1) tačka b) Izbornog zakona BiH izrečena novčana kazna u iznosu od 500,00 KM.

Odlučujući o navodima žalbe kojima se ističe da žalilac nema dokaza da je izjavu putem pošte dostavio u zakonom predviđenom roku, pa ovo vijeće zaključuje da se ponovo dostavljanje izjave o imovinskom stanju uz žalbu ne može prihvatiti opravdanim razlogom za ponovno razmatranje van zakonom predviđenog roka u situaciji kada je očigledno da njegov izvještaj nije zaprimila Centralna izborna komisija BiH, zbog čega su žalbeni navodi irelevantni za rješavanje u ovoj pravnoj stvari. U pogledu visinu izrečene kazne, ovo vijeće je cijenilo činjenicu da je izrečena kazna u okvirima zakonskog minimuma srazmjerna učinjenom prekršaju.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA  
SUDIJA**

**Zvezdana Antonović**